



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

06.05.2013թ.

Ո Ր Ո Շ ՈՒ Մ

ԳԲԽ-25/13 բողոքը քննող հանձնաժողովի

ԳԲԽ-25/13 բողոքը քննող հանձնաժողովը՝ գործելով գնումների բողոքարկման խորհրդի անունից, քննելով «Քանաքեռի կարի ֆաբրիկա» ՍՊԸ-ի կողմից 15.04.2013թ. «Գնումների աջակցման կենտրոն» ՊՈԱԿ-ին ներկայացված բողոքը, ինչպես նաև ուսումնասիրելով ԳԲԽ-25/13 բողոքի վերաբերյալ «Գնումների աջակցման կենտրոն» ՊՈԱԿ-ի կողմից ներկայացված եզրակացությունը պարզեց.

1. «Քանաքեռի կարի ֆաբրիկա» ՍՊԸ-ի կողմից ներկայացված փաստերը, հիմնավորումները և պահանջը.

«Գնումների աջակցման կենտրոն» ՊՈԱԿ-ին ներկայացված բողոքով «Քանաքեռի կարի ֆաբրիկա» ՍՊԸ-ն հայտնել է, որ ՀՀ պաշտպանության նախարարությունը համապատասխան հանդերձանք ձեռք բերելու նպատակով կազմակերպել է «ԳԱԿ-ՇՀԱՊՁԲ-11/10 - ՀՀ ՊՆ ՆՏԱԴ-ՇՀԱՊՁԲ-7/42» ծածկագրով ընթացակարգ և հրավեր է ուղարկել «ԳԱԿ-ՇՀԱՊՁԲ-11/10» ծածկագրով գրանցված բոլոր հնարավոր մասնակիցներին:

Նշված ընթացակարգին մասնակցել և մի շարք չափաբաժիններով ընտրված մասնակից է ճանաչվել «Անգել» ՍՊԸ-ն:

«Քանաքեռի կարի ֆաբրիկան» ՍՊԸ-ն հայտնել է, որ Հայաստանի Հանրապետության հարկային ծառայության պաշտոնական կայքից ներբեռնված տվյալների համաձայն, «Անգել» ՍՊԸ-ն՝ ՀՎՀՀ՝ 00881766, իրավաբանական հասցեն՝ ք.Երևան, Քուչակ թաղ., 16/2 2., ՀՀ հարկ վճարողների համակարգում գրանցվել (հաշվառվել) է ս.թ փետրվարի 21-ին, իսկ վերջինիս կարգավիճակը համաձայն նույն կայքից վերցված տվյալների համարվում է նոր գրանցված:

ՀՀ կառավարության 10.02.2011թ N 168-Ն որոշմամբ հաստատված կարգի 101-րդ կետով սահմանված է, որ գնումների հայտարարության և հրավերի հրապարակումից հետո, գնման գործընթացին մասնակցելու ցանկություն ունեցող անձը, որպես հնարավոր մասնակից գրանցվելու նպատակով, Գնումների աջակցման կենտրոն է ներկայացնում գրանցման հայտ, որը ներառում է՝

- 1) գրավոր դիմում՝ հասցեագրված Գնումների աջակցման կենտրոնի ղեկավարին,
- 2) մասնակցի կողմից հաստատված գրավոր հայտարարություն՝ հրավերով սահմանված մասնակցության իրավունքի պահանջներին իր տվյալների համապատասխանության մասին,
- 3) հրավերով սահմանված՝ որակավորման չափանիշներին իր հատկանիշների համապատասխանությունը հիմնավորող փաստաթղթեր,
- 4) հայտի ապահովում՝ տուժանքի ձևով, որի չափը հավասար է գնումների բազային միավորին:

Այսինքն վերջինիս կողմից «ԳԱԿ-ՇՀԱՊՁԲ-11/10» ծածկագրով ընթացակարգին որպես հնարավոր մասնակից գրանցվելու նպատակով հավելված N 3-ով ներկայացված Ընթացակարգի հրավերով նախատեսված որակավորման պահանջներին համապատասխանության մասին հայտարարությունը չի համապատասխանում ՀՀ կառավարության 10.02.2011թ. N 168-Ն որոշմամբ հաստատված կարգի 101-րդ կետով սահմանված պահանջներին:

«Գնումների մասին» ՀՀ օրենքի 5-րդ հոդվածով նախատեսված է, որ Մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝

- 1) մասնագիտական գործունեության համապատասխանություն պայմանագրով նախատեսված գործունեությանը
- 2) մասնագիտական փորձառություն

- 3) տեխնիկական միջոցներ
- 4) ֆինանսական միջոցներ
- 5) աշխատանքային ռեսուրսներ:

«ԳԱԿ-ՇՀԱՊՁԲ-11/10» ծածկագրով հրավերի 2.2 կետով սահմանված է, որ Մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝

1) մասնագիտական գործունեության համապատասխանություն պայմանագրով նախատեսված գործունեությանը

- 2) մասնագիտական փորձառություն
- 3) տեխնիկական միջոցներ
- 4) ֆինանսական միջոցներ
- 5) աշխատանքային ռեսուրսներ:

«Քանաքեռի կարի ֆաբրիկա» ՍՊԸ-ն գտնում է, որ «Անգել» ՍՊԸ-ն չի համապատասխանում «Գնումների մասին» ՀՀ օրենքի 5-րդ հոդվածի 3-րդ մասով սահմանված չափանիշներին:

Հաշվի առնելով վերը նշված հանգամանքները, ընկերությունը խնդրել է դադարեցնել «ԳԱԿ-ՇՀԱՊՁԲ-11/10-ՀՀ ՊՆ ՆՏԱԴ-ՇՀԱՊՁԲ-7/42» ծածկագրով ընթացակարգի հանձնաժողովի «Անգել» ՍՊԸ-ին տարբեր չափաբաժիններով ընտրված մասնակից ճանաչելու համապատասխան որոշումները:

2. ՀՀ պաշտպանության նախարարության կողմից բողոքի վերաբերյալ ներկայացված փաստերը և հիմնավորումները.

«Գնումների աջակցման կենտրոն» ՊՈԱԿ-ը 18.04.2013թ. N 04/032-619 գրությամբ դիմել է ՀՀ պաշտպանության նախարարությանը՝ խնդրելով կարծիք տալ «Գնումների աջակցման կենտրոն» ՊՈԱԿ-ում 15.04.2013թ. «Քանաքեռի կարի ֆաբրիկա» ՍՊԸ-ի կողմից ներկայացված բողոքի վերաբերյալ:

ՀՀ պաշտպանության նախարարությունը 26.04.2013թ. N ԴՎԱ/1245 գրությամբ Կենտրոնին է ներկայացրել «ԳԱԿ-ՇՀԱՊՁԲ-11/10 - ՀՀ ՊՆ ՆՏԱԴ-ՇՀԱՊՁԲ-7/42» ծածկագրով գնման ընթացակարգին վերաբերող փաստաթղթեր և «Անգել» ՍՊԸ-ի հայտի պատճենները, իսկ բողոքի վերաբերյալ որևէ կարծիք չի հայտնել:

3. ԳԲԽ-25/13 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը.

«Գնումների աջակցման կենտրոն» ՊՈԱԿ-ը հանձնաժողովին ներկայացրել է իր եզրակացությունը և առաջարկել է «Քանաքեռի կարի ֆաբրիկա» ՍՊԸ-ի կողմից 15.04.2013թ. «Գնումների աջակցման կենտրոն» ՊՈԱԿ-ին ներկայացված բողոքը մերժել:

4. ԳԲԽ-25/13 բողոքի վերաբերյալ էական նշանակություն ունեցող փաստերը, ԳԲԽ-25/13 բողոքը քննող հանձնաժողովի հիմնավորումները և եզրահանգումները.

Հանձնաժողովն ուսումնասիրել է «Քանաքեռի կարի ֆաբրիկա» ՍՊԸ-ի (այսուհետև՝ նաև Ընկերություն) կողմից 15.04.2013թ. ներկայացված բողոքը, «ԳԱԿ-ՇՀԱՊՁԲ-11/10» ծածկագրով շրջանակային համաձայնագրի միջոցով գնում կատարելու ընթացակարգի հրավերը, ՀՀ պետական եկամուտների կոմիտեի 03.05.2013թ. N 4-1/4949-13 գրությունը, «Անգել» ՍՊԸ-ի 03.05.2013թ. գրությունը և գրությամբ ներկայացված փաստաթղթերը, «Գնումների աջակցման կենտրոն» ՊՈԱԿ-ի եզրակացությունը:

ՀՀ պաշտպանության նախարարության կողմից հանդերձանքի ձեռքբերման նպատակով կազմակերպվել է «ԳԱԿ-ՇՀԱՊՁԲ-11/10-ՀՀ ՊՆ ՆՏԱԴ-ՇՀԱՊՁԲ-7/42» ծածկագրով շրջանակային համաձայնագրերի միջոցով գնում կատարելու ընթացակարգ (այսուհետև՝ նաև Ընթացակարգ):

Ընթացակարգին մասնակցելու նպատակով ի թիվս այլ ընկերությունների մասնակցության հայտ են ներկայացրել «Քանաքեռի կարի ֆաբրիկա» ՍՊԸ-ն և «Անգել» ՍՊԸ-ն:

«Քանաքեռի կարի ֆաբրիկա» ՍՊԸ-ն Կենտրոնին ներկայացված բողոքով հայտնել է, որ Ընթացակարգին մասնակցած և մի շարք չափաբաժիններով որպես ընտրված մասնակից ճանաչված «Անգել» ՍՊԸ-ն Հայաստանի Հանրապետության հարկային ծառայության պաշտոնական կայքից ներբեռնված տվյալների համաձայն ՀՀ հարկ վճարողների համակարգում գրանցվել (հաշվառվել) է ս.թ փետրվարի 21-ին, իսկ վերջինիս կարգավիճակը համաձայն նույն կայքից վերցված տվյալների համարվում է նոր գրանցված՝

այսինքն վերջինիս կողմից «ԳԱԿ-ՇՀԱՊՁԲ-11/10» ծածկագրով ընթացակարգին որպես հնարավոր մասնակից գրանցվելու նպատակով ներկայացված ընթացակարգի հրավերով նախատեսված որակավորման պահանջներին համապատասխանության մասին հայտարարությունը չի համապատասխանում ՀՀ կառավարության 10.02.2011թ. N 168-Ն որոշմամբ հաստատված կարգի 101-րդ կետի 3-րդ ենթակետով սահմանված պահանջներին, ինչպես նաև «Գնումների մասին» ՀՀ օրենքի 5-րդ հոդվածի 3-րդ մասով սահմանված չափանիշներին:

Կենտրոնը 25.04.2013թ. N 05/032-648 գրությամբ դիմել է ՀՀ պետական եկամուտների կոմիտեին՝ խնդրելով Կենտրոնին ներկայացնել «Անգել» ՍՊԸ-ի ՀՀ հարկ վճարողների համակարգում գրանցվելու սկզբնաժամկետի և տնտեսական գործունեության վերաբերյալ տեղեկություններ:

ՀՀ պետական եկամուտների կոմիտեն 03.05.2013թ. Կենտրոնին ներկայացված N 4-1/4949-13 գրությամբ տեղեկացրել է, որ «Անգել» (ՀՎՀՀ 00881766) ՍՊԸ-ն պետական գրանցում է ստացել 21.02.2013թ. և 21.04.2013թ. ՀՀ ԿԱ ՊԵԿ Նոր Նորքի ՀՏ ներկայացրած հաշվարկների համաձայն ընկերությունը ունի 6 աշխատող, ինչպես նաև 2013թ. 1-ին եռամսյակում արտադրական գործունեությունից ստացված եկամուտները կազմել են 3.576.6 հազար դրամ:

Կենտրոնը 25.04.2013թ. N 09/032-649 գրությամբ դիմել է «Անգել» ՍՊԸ-ին՝ առաջարկելով կարծիք տալ «Գնումների աջակցման կենտրոն» ՊՈԱԿ-ում 15.04.2013թ. «Քանաքեռի կարի ֆարմիկա» ՍՊԸ-ի կողմից ներկայացված բողոքի վերաբերյալ:

Կենտրոնում ս.թ. մայիսի 3-ին ԳԲԽ 25/13 բողոքի շրջանակներում կազմակերպված բանավոր լսումների ընթացքում «Անգել» ՍՊԸ-ի ներկայացուցիչը հանձնաժողովին ներկայացրեց 03.05.2013թ. գրությունը, որով հայտնել է, որ «Անգել» ՍՊԸ-ն ստացել է պետական գրանցում և 21.02.2013թ. գրանցվել է Նոր Նորքի հարկային տեսչությունում: Նախապես ունենալով որոշ կազմակերպությունների հետ նախնական համաձայնություններ՝ ընկերությունը պետական գրանցում ստանալուց հետո ի դեմս ընկերության տնօրենի ս.թ. փետրվարի 22-ից 26-ը կնքել է մի քանի արտադրանքների մատակարարման պայմանագրեր:

«Անգել» ՍՊԸ-ն հայտնել է, որ ընկերությունն ունի երկարաժամկետ վարձակալած աշխատանքային տարածքներ, արտադրական գույք և միջոցներ: Ընկերությունում աշխատանքի են անցել տարիների փորձ և փորձառություն ունեցող մասնագետներ և վարպետներ: Ելնելով վերը նշված հնարավորություններից «Անգել» ՍՊԸ-ն կարողացել է

սեղմ ժամկետում կատարել իր ստանձնած պայմանագրային պարտավորությունները և գնորդ ընկերություններին տրամադրել պահանջված արտադրատեսակները: Որպես շարադրվածի վկայություն՝ «Անգել» ՍՊԸ-ի կողմից գրությանը կից ներկայացվել է տարածքի և գույքի վարձակալության 21.02.2013թ. կնքված պայմանագրի պատճենը, 23.02.2013թ., 26.02.2013թ. և 27.02.2013թ. կնքված պայմանագրերի և արտադրանքի մատակարարման 25.02.2013թ. N 01, 27.02.2013թ. N 02 և 28.02.2013թ. N 03 հաշիվների պատճենները, ընկերության պետական գրանցման վկայականի պատճենը, Նոր Նորքի հարկային տեսչությանը «Անգել» ՍՊԸ-ի կողմից 1-ին եռամսյակի համար ներկայացված շրջանառության հարկի հաշվարկը: Հանձնաժողովի այն հարցին, թե «Անգել» ՍՊԸ-ն ինչով կարող է հավաստել իր ֆինանսական միջոցների, աշխատանքային ռեսուրսների և տեխնիկական միջոցների չափանիշներին համապատասխանությունը, «Անգել» ՍՊԸ-ի ներկայացուցիչը հայտնեց, որ վերը նշված որոկավորման չափանիշներին համապատասխանությունը հիմնավորող փաստաթղթերը ներկայացնելու համար լրացուցիչ ժամանակ է հարկավոր և խնդրեց հնարավորություն ընձեռել հաջորդ նիստի ժամանակ ներկայացնելու պահանջվող փաստաթղթերը:

«Գնումների մասին» ՀՀ օրենքի (այսուհետև՝ նաև Օրենք) 5-րդ հոդվածի 3-րդ մասի համաձայն՝ Մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝ մասնագիտական գործունեության համապատասխանություն պայմանագրով նախատեսված գործունեությանը, մասնագիտական փորձառություն, տեխնիկական միջոցներ, ֆինանսական միջոցներ, աշխատանքային ռեսուրսներ:

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետև՝ նաև Կարգ) 101-րդ կետի 3-րդ ենթակետի համաձայն՝ գնումների հայտարարության և հրավերի հրապարակումից հետո, զնման գործընթացին մասնակցելու ցանկություն ունեցող անձը, որպես հնարավոր մասնակից գրանցվելու նպատակով, Գնումների աջակցման կենտրոն է ներկայացնում գրանցման հայտ, որը ներառում է հրավերով սահմանված՝ որակավորման չափանիշներին իր հատկանիշների համապատասխանությունը հիմնավորող փաստաթղթեր:

«Անգել» ՍՊԸ-ն «ԳԱԿ-ՇՀԱՊԶԲ-11/10» ծածկագրով ընթացակարգին որպես հնարավոր մասնակից գրանցվելու նպատակով ս.թ. փետրվարի 26-ին «Գնումների աջակցման կենտրոն» ՊՈԱԿ-ին է ներկայացրել հրավերի N3 հավելվածով նախատեսված

որակավորման պահանջներին համապատասխանության մասին հայտարարություն, որով հայտնել և հավաստել է, որ «Անգել» ՍՊԸ-ն ունի պայմանագրով նախատեսված պարտավորությունների կատարման համար հրավերով պահանջվող՝ մասնագիտական գործունեության համապատասխանություն պայմանագրով նախատեսված գործունեությանը, մասնագիտական փորձառություն, տեխնիկական միջոցներ, ֆինանսական միջոցներ, աշխատանքային ռեսուրսներ, որի հիման վրա «Գնումների աջակցման կենտրոն» ՊՈԱԿ-ի և «Անգել» ՍՊԸ-ի միջև 04.03.2013թ. կնքվել է հանդերձանքի գնման N ՇՀԱՊՁԲ-11/10-148 ծածկագրով շրջանակային համաձայնագիրը:

«Անգել» ՍՊԸ-ն 03.05.2013թ. գրությամբ՝ որպես մասնագիտական գործունեության համապատասխանություն պայմանագրով նախատեսված գործունեությանը և մասնագիտական փորձառություն չափանիշների հավաստում Կենտրոնին է ներկայացրել «Անգել» ՍՊԸ-ի և «Մարմոնտաժ» ՍՊԸ-ի միջև 23.02.2013թ. կնքված պայմանագիրը և պայմանագրով նախատեսված ապրանքների մատակարարման 25.02.2013թ. կնքված ընդհանուր 1.132.200 ՀՀ դրամ գումարի հանձնման-ընդունման արձանագրությունը, որով N1 չափաբաժնով նախատեսված ապրանքի համար նշվել է անվանումը՝ համազգեստ (կոմբինեզոն), քանակը՝ 12, միավորը՝ հատ, գինը՝ 24.000, գումարը՝ 288.000, իսկ N 2 չափաբաժնով նախատեսված ապրանքի մասով անվանումը՝ բաճկոն, քանակը՝ 21, միավորը՝ 21, գինը՝ 40.200, գումարը՝ 844.200:

Կենտրոնում 2013թ. մայիսի 6-ին հրավիրված ԳԲԽ 25/13 բողոքը քննող հանձնաժողովի նիստի ընթացքում, «Անգել» ՍՊԸ-ի ներկայացուցիչը Հանձնաժողովին.

- որպես ֆինանսական միջոցները հավաստող փաստաթուղթ ներկայացրեց «Բլեսս» ունիվերսալ վարկային կազմակերպության 25.02.2013թ. N ՀՍ-048/1 գրությունը, որի համաձայն «ԲԼԵՍՍ» ՈՒՎԿ ՍՊԸ-ի համապատասխան իրավասու մարմնը 25.02.2013թ. քննարկել և որոշում է կայացրել բավարարել ընկերությանը 3.000.000 ՀՀ դրամի չափով, մինչև 30.12.2013թ. մարման վերջնական ժամկետով, տարեկան 22% տոկոսադրույքով վարկային գիծ բացելու և ընկերության առաջին պահանջով վերը նշված վարկային գծի սահմաններում գումարը ընկերությանը տրամադրելու վերաբերյալ «Անգել» ՍՊԸ-ի հայտը,

- որպես տեխնիկական միջոցները հավաստող փաստաթուղթ ներկայացրեց «Անգել» ՍՊԸ-ի և ՀՀ քաղաքացի Գագիկ Բեգլարի Կոստանդյանի միջև 22.02.2013թ. կնքված տրանսպորտային միջոցների վարձակալության մասին պայմանագիրը,

- որպես աշխատանքային ռեսուրսներ հիմնավարող փաստաթուղթ ներկայացրեց «Անգել» ՍՊԸ-ի և Հասմիկ Ղուկասյանի, Նարինե Մաթևոսյանի, Վալենտինա Մինասյանի,

Աշոտ Գասպարյանի և Սոնյա Դարբինյանի միջև 22.02.2013թ. կնքված աշխատանքային պայմանագրերը:

Գնումների բողոքարկման խորհուրդը գտնում է, որ «Անգել» ՍՊԸ-ի կողմից «ԳԱԿ-ՇՀԱՊՁԲ-11/10» ծածկագրով ընթացակարգին որպես հնարավոր մասնակից գրանցվելու նպատակով «Գնումների աջակցման կենտրոն» ՊՈԱԿ-ին Կարգի 101-րդ կետի 3-րդ ենթակետի՝ ընթացակարգի հրավերով նախատեսված որակավորման պահանջներին համապատասխանության մասին 26.02.2013թ. Կենտրոնին ներկայացված հայտարարությունը եղել է հիմնավորված և «Անգել» ՍՊԸ-ն բավարարել է Օրենքի 5-րդ հոդվածի 3-րդ մասով և հրավերով սահմանված որակավորման չափանիշներին:

Վերոգրյալի հիման վրա և հիմք ընդունելով «Գնումների մասին» ՀՀ օրենքի 48-րդ հոդվածի 5-րդ մասը գնումների բողոքարկման խորհուրդը

Ո Ր Ո Շ Ե Ց

«Քանաքեռի կարի ֆաբրիկա» ՍՊԸ-ի կողմից 15.04.2013թ. Կենտրոնին ներկայացված բողոքը մերժել:

Գնումների բողոքարկման խորհրդի որոշումն իրավապարտադիր է:

Գնումների բողոքարկման խորհրդի կայացրած որոշումը կարող է բողոքարկվել դատական կարգով:

Բողոքը քննող հանձնաժողովի՝

Նախագահ՝ Գոռ Ենոքյան



Անդամ՝ Աշոտ Մարդյան

